

10/10/1997

Negara masih jadi pilihan pelabur

KUALA LUMPUR, Khamis - Datuk Seri Dr Mahathir Mohamad berkata, Malaysia masih menjadi destinasi pelaburan menarik walaupun dilanda kemelut dalam pasaran kewangan.

Perdana Menteri berkata, pelabur dari Britain dan Eropah akan mendapati di negara ini sebuah kerajaan yang akrab dengan sektor perniagaan, sebuah ekonomi pasaran, sektor swasta yang proaktif dan optimisme yang melimpah.

Malaysia akan terus mengalu-ngalukan pelaburan asing, katanya dalam perutusan sempena Perkongsian Malaysia-Britain, Dialog London yang akan diadakan di London.

Dialog yang akan diadakan pada 21 Oktober dengan tema `Perkongsian Dinamik Malaysia dan Britain Bagi Abad Ke-21' akan dihadiri kira-kira 300 pemimpin korporat dari kedua-dua negara.

Ia dianjurkan oleh Institut Kepimpinan dan Strategi Asia dengan kerjasama Persatuan Britain Malaysia, Asia House dan Pusat Kajian Komanwel Malaysia, Universiti Cambridge.

Dr Mahathir berkata, kerajaan sudah mengambil langkah yang berani untuk mengatasi krisis mata wang dan pasaran saham yang menghakis nilai ringgit.

(END)